

[Augsburg], 28. November 1562

An Johannes Oporinus

UB Basel, Fr. Gr. I 11, fol. 256r.

Steinmann Nr. 747.

Lit.: Husner S. 157.

S. P. D. Scripsi non ita pridem ternas literas eius generis, quas fortasse nec a me scribi, nec ad te mitti decuit, nisi tu mihi illas ipse dictasses. Peccandi enim a te profectum est initium, qui tertium iam annum expectationem meam frustratus, denique apertè me derisisti. Quid enim aliud est istud? Epitaphium Moibani mihi perijt. ergo in excudendo Epicteto pergere non possum. Quem si caepisses vnquam: specimen vtique toties flagitatum mihi misisses. Non ignoro difficultates rerum tuarum, noui occupationes, fortunam miseror et saepe studui subleuare. Sed ista profectò tanti non sunt, vt et meis et tuis rationibus libello 40 paginarum circiter edendo, consulere non possis. Et vt non possis: aequum est te meum ἀρχέτυπον mihi restituere. Neque enim tam impudens ego sum, vt propter meas nugas aliquid detrimenti capere te velim, neque tu ita iniquus, vt me inuito, et cum imminutione et existimationis et rei familiaris meae (cuius tenuitati ex ista dedicatione accessionis aliquid spero) mea detineas, quibus ipse vti frui hoc tempore nolusti. Vtilitatem, quam ad studiosos homines reddituram spero ex isto opere, non commemoro, quae me cum primis mouet. Cum autem se nunc peropportuna det occasio: etiam atque etiam vehementer te oro, Mi D. Oporine, vt incolumi amicitia, quam nihilominus omnibus officijs tuebor, Epicteti omnia et graeca et latina mihi remittas et Hilleri, qui ea de re ad te scribit, vasculo includas. Quod si plura Gregorae exempla (vt vltrò pollicitus es) et quintam Ecclesiasticae historiae centuriam addere volueris: rem gratam facies. Sed hoc non vrgeo, et malo auaros amicos de me conqueri, quam me tibi auarum et importunum videri. Illud verò ita peto, postulo, flagito, vt nihil magis, meas vt mihi lucubrationes mox remittas, meqüe denuo exscribendi labore molestissimo leues. Nam de tua quidem editione iampridem desperauit. Suspicer enim, temere fortasse, sed tamen suspicor, te aut meam improbare versionem, aut alijs vendibilioribus libris posthabere, aut Fuggeri Scheggijqüe offensionem vereri, aut Arrianos graecolatinos prius distrahere velle, aut Wolfium Fuggerana familia iam exulanter negligere et contemnere ως κάθαρμα και περίψημα et Acheronticum senacionem, qui posthac prodesse tibi nulla re possit, obesse autem nolit. Vtcunque sit: res eodem recidit, vt me incolumi liber meus non edatur. Cuius editionis ita sum auidus, vt nihil vnquam desiderarim magis. Tu verò alias quaeso doceas πρακτικῶς φιλοσοφεῖν, et omnia pro nihilo putare. Mea mihi curae sunt, et id quoque philosophicum esse existimo. Vale. 28 Nouembris 1562.

Hiero[nymus] Wolfius
Scholarcha Augustanus.